

Script Of Morning Gojri News Bulletin 15 June 2024 at 1015Hrs

ما رنينگ گو جری نیو ز بلیٹن مو رخہ 15 جون 2024

یوہ آکا شوانی جموں بے عبدالرحمن شاپین تیں خبر سُنو۔

PM G7 Summit

وزیر اعظم نریندرمو دی نے اس گل غی ضرورت ور زور دتو بے جے عالمی جنوب تے خاصکر افریقہ غا خدشات نانہہ ترجیح دتی جا ئے۔ تے عالمی برادری نانہہ ٹیکنالوجی مانہہ اجارہ داری بند کرنی چاہیے۔ تے اس تک ہر اک غی رسائی نانہہ یقینی بنایو جائے۔ تانجے اک مربوط سماج غی بنیا د قائم وے، تے سماجی عدم مساوات نانہہ ختم کرن مانہہ مدد ملے۔ آپولہ ایٹلی مانہہ کل جی 7 سربراہ کا نفرنس غا موقع ور رسائی اجلاس سنگ خطاب کرتاں واں جناب مو دی نے اس گل نانہہ یاد کرایو جے یاہ بھارت واسطے بڑی فخر آلی گل بے جے بھارت غی صدارت غے تحت افریقی یونین نانہہ جی 20 غو مستقل ممبر تسلیم کیو گیو۔ جناب نریندرمو دی نے کہیو جے مصنو عی ذہانت نانہہ شفاف، منصفانہ، باحفاظت، رسائی پزیر تے جو بدہ بنان با رے بھارت تمام ملکاں سنگ کم کرے گو۔ اُنہاں نے مزید کہیو جے توانائی غا میدان مانہہ بھارت غو نظریو 4 اصولاں ور بے، دستیابی، رسائی، استطاعت تے قبولیت۔ وزیر اعظم جناب مو دی نے اس کا نفرنس غے اک پا سے اٹلی، برطانیہ تے جاپان سمیت بہت سارہ ملکاں گا عالمی لیڈراں سنگ وی ملاقات کی۔

Amit Shah

مرکزی وزیر داخلہ امت شاہ نے پلک اک اعلیٰ سٹی میٹنگ بلائی ہے۔ جس دوران مرکزی زیر انتظام علاقہ جموں کشمیر مانہہ موجو دہ صورتحال غو جائزو لیو جا ئے گو۔ واضع رہ جے ات حالیہ دہشت گردانہ واقعات خاصکر جموں خطہ غا ریا سی ضلع مانہہ زائرین نانہہ لیجاری بس ور ہوا حملہ نانہہ دیکھتاں واں یاہ میٹنگ بلائی گئی ہے۔ اس میٹنگ مانہہ قومی حفاظتی صلاحکار اجیت ڈووال، جموں کشمیر غا لیفٹنٹ

گو رنر منوج سنہا فوج و نیم فوجی دستاں غا اعلیٰ افسراں تے دوجا عہدیداراں غی شمولیت وی متوقع ہے۔ جس دوران دہشت گردانہ واقعات ور روک لان با رے اقدامات ور غور کیو جائے گو۔ خبررساں ایجنسی پی ٹی آئی نے دسیو ہے جے مرکزی وزیر داخلہ نے کل جموں کشمیر غی حفاظتی صورتحال غو جائزو لیو ہے۔ تے اُنہاں نے مزید لائح عمل تہہ کرن با رے اک اعلیٰ سطحی میٹنگ منعقد کرن غو فیصلو کیو ہے۔ واضع رہ جے اس تیں پہلاں وزیر اعظم نے اک بکھری میٹنگ مانہہ حفاظتی ایجنسیاں نانہہ کہیو ہے جے وے مرکزی زیر انتظام علاقہ جموں کشمیر مانہہ دہشت گرداں تے اُن غا معاونان غے خلاف کڑہ بو جائیں۔

Searches

ڈوڈہ ضلع غا بہت سارہ پہاڑی علاقان مانہہ فوج، پولیس تے نیم فوجی دستاں غی طرفوں اُن دہشت گرداں نانہہ کہیرن با رے لگاتار تلاشی اُپریشن جا ری ہے۔ جھیڑا حال بی مانہہ چھترگالہ تے گندھو علاقہ مانہہ باندے آیا تے حفاظتی دستاں ور حملو کرتاں واں 7 حفاظتی اہلکاراں نانہہ زخمی کر غے اُتوں نسن مانہہ کامیاب بو گیا۔ اسے دوران ریا سی تے راجو ری ضلعان غی سرحدان ور تریاٹھ کا لاکوٹ علاقہ مانہہ وی تلاشی اُپریشن تیز کر دو گیو ہے۔ جت 9 جون نانہہ دہشت گرداں نے یا تریاں غی اک بس نانہہ نشانو بنايو تھو۔ فوج، پولیس، ایس او جی تے نیم فوجی دستاں غی بہت ساری ٹیم دہشت گرداں نانہہ مار مکان با رے پہاڑی علاقان مانہہ چڑھائی کر رہی ہیں۔ پولیس نے پہلاں ہی 4 دہشت گرداں غا خاکہ جا ری کیا واہ ہیں تے اُن با رے اطلاع دین آلاں نانہہ 20 لکھ روپیاں غا انعام غو وی اعلان کیو وہ ہے۔ اسے طرح کٹھوعہ ضلع غا بیرا نگر سیکٹر مانہہ وی سرحدی علاقان مانہہ تلاشی جا ری ہے۔ جت حفاظتی دستاں نے 11 تے 12 جون نانہہ 2 دہشت گرداں نانہہ مارمکایو تھو۔ تے اس دوران سی آر پی ایف غو اک جوان وی شہید بو گیو تھو تے اک سول شخص وی زخمی ہوؤ تھو۔

Div Com

صوبائی کمشنر جموں رامیش کمار نے اڈیشنل ڈائریکٹر جنرل پولیس جموں آنند جین نے کل سول سو سائیٹی جموں گا ممبراں سنگ اک میٹنگ لا غے آتی شری امرناتھ جی یا ترا نانہ احسن طریقہ سنگ منعقد کروان بارے تبادلہ خیال کیو۔ تے جموں خطہ مانہ موجو ده صورتحال با رے غلط معلومات با رے خدشات نانہ دور کیو گیو۔ میٹنگ غے دوران صوبائی کمشنر نے کہیو جے شری امرناتھ جی یا ترہ نانہ احسن طریقہ سنگ منعقد کروان اور اس نانہ کامیاب بنان مانہ سول سماج تے عام عوام غو بڑو اہم رول ہے۔ اس موقع ور اے ڈی جی پی جموں نے سول سو سائیٹی گا ممبراں سنگ با ت چیت کرتاں واں اُنہاں نانہ تے عام لوکاں نانہ اپیل کی جے وے ایسی معلومات ور یقین نہ کریں جہیڑی کہ پختہ بنیا د آلی تے تسلیم شدہ نہ ویں۔ میٹنگ غے دوران تجا رتی مالکان تے مذہبی سربراہان تے خیراتی اداراں ور زور دتو گیو جے وے اپنی دکاناں تے اداراں غے ارد گرد سی سی ٹی وی کیمرہ نصب کراویں۔

ACB Land Scam

انسداد بدعنوانی بیورو نے جموں مانہ اک زمینی گھوٹالہ نانہ باندے آنیو ہے۔ جس مانہ دسیو جا رہیو ہے کہ زمین مافیہ نے کجھ سرکاری ملازمین سنگ مل غے 28 ایکڑ تیں متی زمین بڑپی ہے۔ اس سلسلہ مانہ تحقیقاتی ایجنسی غی طرفوں سرکاری ملازماں سمیت قصوروار افراد غے خلاف 5 ایف آئی آرز درج کی گئی ہیں۔ تے اس گھوٹالہ مانہ مبینہ طور ور ملوث افراد غے خلاف چھاپہ ماری کی جا رہی ہے۔ کل اخباری نمائنداں سنگ با ت چیت کرتاں واں انسداد بدعنوانی بیورو یعنی اے سی بی جموں گا ڈی آئی جی وکاس گپتا نے دسیو جے ابتدائی تحقیقات مانہ اس معاملہ با رے پتو چلیو ہے جے محکمہ مال، کسٹوڈین تے پولیس گا ملازمین غی مدد سنگ زمینی مافیہ نے جموں ضلع اسروان، مشری والا تے بھلوال علاقہ مانہ 225 کنال کسٹوڈین زمین ور ناجائز قبضو کراویو۔ اُنہاں نے کہیو جے تحصیلداراں ، ناٹب تحصیلداراں تے پٹواریاں سمیت کوئی 8 تیں 10 موجودہ تے ریٹائرڈ محکمہ مال گا

ملازمین غو ناں اجوں تک ایف آئی آر مانہہ بے تے اس معاملہ غی مزید تحقیقات جا ری بے۔

PM Vishwkarma Urdu

وزیر اعظم ویشو کرما ہدایات نانہہ اُردو پڑھن آلاں گا فائدہ واسطے ایم ایس ایم ای ڈی ایف او جموں غی طرفوں اُردو مانہہ ترجمو کیو گیو بے۔ تے اس نانہہ ویب سائٹ ور

www.MSMEdijammu.gov.in

ور اپ لوڈ کیو گیو بے۔ اک سرکا ری بیان غے مطابق ایم ایس ایم ای ڈی ایف او جموں غی طرفوں پی ایم ویشو کرما غے تحت روزانہ غی بنیا د ور جموں کشمیر غا 20 ضلعان تیں موصول درخواستاں نانہہ اگے ٹوریو جا ئے۔ اس سکیم نانہہ جموں کشمیر حکومت غی چُست مدد سنگ ایم ایس ایم ای غی مرکزی وزارت غی طرفوں عملیو جا ریو بے۔

Cricket

آئی سی سی مرداں گا عالمی کپ ٹی ٹوائٹی مانہہ امریکہ نے سَپر 8 مانہہ اپنی جگہ بنا لی بے۔ پچھلے تہاڑے گروپ مقابلہ مانہہ ائر لینڈ تے امریکہ غو مقابلو با رش غی وجہ تیں رد ہو گیو۔ امریکہ کرکٹ غی تا ریخ مانہہ پہلی با ر اس مرحلہ مانہہ پُجیو بے۔ گروپ اے مانہہ بھارت تیں بعد امریکہ سَپر 8 مانہہ جگہ بنان آلو امریکہ دوجو مُلک بے۔ اج ہارت غو مقابلو کنیڈہ نال شام 8 بجے فلوریڈا مانہہ کھیڈیو جا ئے گو۔

اس غے نال ہی خبراں غو یوہ بلیٹن ختم ہوؤ۔